




27,746/A

319





DE
LITHONTRIPTICO
a
JOANNA STEPHENS
NUPER INVENTO
DISSERTATIO EPISTOLARIS
AUCTORE
DAVIDE HARTLEY, A. M. & R. S. S.

Ex his principiis via ad majora sternitur.
NEWTON.



BASILEAE,
Apud JOHANNEM CHRIST.,
MDCCXL.



303613



MEDICIS EXTERIS DAVID HARTLEY

Medicus Londinensis.

S. P. D.

Cum *Lithontripicum*, ad calculos tam in renibus quam in vesica solvendos efficax, hic in *Anglia* nuper inventum, editum ac multiplici experientia rerumque suffragiis comprobatum fuerit; visum est, compendium quoddam eorum, quae hac de re lingua vernacula conscripta sunt, vobis latine exhibere.

Constat *Lithontripicum* hoc *testis ovorum calcinatis*, & *sapone Alicantico*.

Testae tum dicuntur *calcinari*, quando comburuntur in calcem vivam, quod patebit ex colore albo & sapore acerrimo, & halitu, addito lixivio salis ammoniaci penetrantissimo; nam hae tres conditiones universae calcium vivarum familiae communes sunt. Postulat autem calcinatio tempus varium, pro variâ ignis vi & crucibuli magnitudine. Perficere solebat *Inventrix* intra

DISSERTATIO

spatium horarum octo vel decem , usq; igne culinari ampio & vehementi , crucibulisque tres *Pintas Anglicanas* , hoc est , tres fere *Sextarios Romanos* continentibus . Postea *testae* exponendae sunt äeri sicco per mensem unum vel alterum , nempe donec se se remittendo concidant magnâ ex parte in pulverem tenuissimum , qui ope superficie a partibus crassioribus ignis vim non satis expertis separandus est , & in vasis vitreis probe obturatis reponendus .

Pulvis hic in primis viis adstringit , & si quid ibi sit acidi absorbet , urinam ciet , fabulum ex renibus deducit , dolores a calculo in rene vel vesicâ oriundos auget ad tempus , vim solventem urinae impertitur : haec omnia eò magis , quò ignem vehementiorem passus , & äeri per brevius intervallum deinde expositus fuerit ; hoc est , quò color ejus candidior , & sapor acrior . Idem forsitan effectus praestari possunt à quavis aliâ calce vivâ , eodem igneae naturae , *vitaeque* ut ita dicam gradu praeditâ , sed experientia nostra ad solam *testarum ovorum* calcem hactenus pertinet .

Sapo Alicantius provenit ab *Alone* sive *Alicantia* , oppido celebri in *Hispaniâ* ; estque ejusdem generis cum *Castiliensi* , *Veneto* , *Foppensi* , reliquisque saponibus , qui ab oris maris *Mediterranei* adferuntur , sed paulo majoris aestimatus a *Fullobus nostris* , & citius vergens à colore coeruleo , quo variegantur horum saponum nonnulli , in album , vel ex albo flavescentem si admodum vetus sit . Insunt illi porrò hinc inde quasi granula cretacea , vel calcaria . Afferit præterea horum reme-

remediorum *Inventrix*, se multâ experientiâ didicisse, *saponem Alicanticum* tum ventriculo gratiorem esse, tum in calculis solvendis potentiores, quovis alio ex supra memoratis. Videntur tamen omnes iisdem ferè virtutibus potiri; omnesque modo genuini sint, non incommodè assumi possunt quantitate permagna. Conficiuntur enim omnes ex oleo olivarum, & calcis vivae salisque fixi alcalini maceratorum lixivio, per coctionem intime unitis. Fieri quidem potest, ut haec Ingredientia a se invicem paulum differant pro diversitate locorum, vel ut methodus iis utendi non sit ubique prorsus eadem, adeoque ut etiam sapo aliis alio commodior sit aliquantò ad usus particulares; attamen haud verisimile est, insignem aliquem effectum ab hoc produci posse, ab illo non item, vel non nisi gradu multo minore.

Methodus pulverem & saponem exhibendi haec est:

R. *Testarum ovorum calcinatarum*, & semi-extinctarum secundum Regulas praecedentes, scrupulos duos, vel duos cum semisse, vel drachmam. Fiat Pulvis, sumendus ter quotidie in quovis vehiculo idoneo, superbibendo semilibram, hoc est, tertiam partem decocti sequentis:

R. *Saponis Alicantici* uncias duas, vel duas cum semisse, vel tres; incide ac solve coquendo in aquae purissimae quantitate sufficiente, ut sit decocti sesquilibra. Coletur & edulcoretur melle, vel faccharo, ad libitum.

Testis calcinatis solebat *Inventrix* sextam circiter partem *Limacum* ad nigritem ustorum, decocto autem *Coronopum Ruellii* similiter ad nigritem ustum,

ut & incoquere *Chamaemelum* vel *Chamaemeli flores*, *Foeniculum dulce*, *Petroselinum* & *Bardanum majorem*. Verum haec, cum nihil conferre videantur ad urinae medicatae vim solventem, satius duxi omittere, remediis idcircò in formam simpliciorem redactis.

Proportio antedicta inter pulverem & saponem, scilicet ut illius dosis sit hujus pars octava, plerumque efficiet, quo minus alvus aut nimis adstricta sit, aut nimis laxa. Sin aliter eveniat, vel augenda vel minuenda est dosis alterutrius, nam uti pulvis adstringit, sic e contrario sapo laxat, dum interea uterque virtute lithontripticā urinam imbuit. Possunt igitur sibi mutuo aptari pro vario statu intestinorum. Potest etiam remedium aliquod adstringens vel laxans decocto addi, aut sub aliâ quâvis formâ assumi, manente antedictâ proportione inter pulverem & saponem. Quod si superveniat Diarrhoea, quae omnem prorsus virtutem lithontripticam secum e corpore abripiet, illicò configiendum ad opiate. Monendi sunt autem aegri, decoctum non esse parandum in vase cupreo, nam sales alcalini saponis cuprum solvunt; unde multum molestiae vel etiam damni ventriculo & intestinis inferri, & nominatim Diarrhoea generari potest.

Animadvertis, me triplicem dosin remediiorum superius assignasse, minimam, medium, maximam. Media dosis, hoc est, pulveris drachmae duae cum semisse, saponis verò unciae duae cum semisse quotidie, convenit aegris mediae aetatis, staturali, habitudinis, valetudinis & id genus aliorum. Quibus infirmior est ventri-

ventriculus , aut dolor in viis urinariis acutior , praestabit minimam exhibere dosin , itemque pul- verem mitiorem , nempe qui aut ignis vi per tem- pus brevius , aut aëri per longius expositus fue- rit . Idem fieri potest aegris in extremâ senectute constitutis , quorum calculi promptius solvuntur , sive quod in senectâ aetate urina putrescentiae con- cipiendae magis sit proclivis , sive quod calculus ipse constet majoribus elementis nec tam arcte connexis inter se ac in junioribus , sive quaevi- alia subsit causa . Pueri e contrario juniores tantum assumere debent , quantum ferendo par- est ventriculus ; cum multis experimentis certio- res facti simus , remedia haec tardius opere suo defungi in illis ; nec ullum extet exemplum , quod novi , injuriae valetudini illatae vel ab au- cta quantitate remediorum , vel a continuato eo- rum usu . Quocirca etiam pro Regulâ generali , meo quidem judicio , haberi queat , tantum assu- mendum esse ab omnibus , quantum commode ferre possint , nam quo plus assumitur , eo cele- rius putrescet quasi & solvetur calculus , eoque magis emollientur laminae & fragmenta calcu- fa , quae cum urinâ ut plurimum redduntur post aliquod tempus ab inceptis remediis . Testari pos- sum , pulveris drachmas tres cum unciis tribus saponis saepius exhibitas fuisse quotidie sine no- xâ . Fuere etiam , quibus calculus solutus est a pulveris drachmis duabus , & saponis unciis dua- bus quotidiè assumptis ; sed non fidendum est quantitati minori , neque ulla interponenda est cessatio , per quam utique relabatur urina in sta- tum naturalem , concrescendo & incrustando ap-

tam. Complures memorare possem his nomini-
bus spe suâ fraudatos , ideoque saepè saepius ad-
monendi sunt delicatuli , & quibus ventriculus
aequo plus irritabilis , ut omni ope nitantur ju-
stam vim remediorum urinae inferre summâ cum
affiduitate & constantiâ.

Quod ad Regimen , satis erit , ut aeger utatur
victu moderato , & abstineat ab acidis , sale con-
ditis & aromaticis , quae nimirum aut alcali re-
mediorum aliquo modo extingueret , aut fitim crea-
re possunt. Debet enim promptam calculi solu-
tionem ex his remediis sibi pollicitus liquida quae-
vis parcus haurire , quandoquidem quo minor
urinae medicatae quantitas , eo major erit vis ejus
solvens. Conveniet porro a motu & exercitio cor-
poris , quae urinam ciere calculosis solent , magnâ
ex parte temperare. Nam urinae mora in ve-
sicâ efficiet , ut tum diutius tum fortius agat in
calculum.

Elapsis aliquot diebus a primâ medicamento-
rum assumptione augentur saepenumero dolores
soliti in viis urinariis , praesertim ubi collum ves-
icae jampridem excoriatum & inflammatum fuerit ,
vel etiam ulceratum (quod ultimum tamen ra-
rò accidit) a frictione calculi. Nam cum urina
medicata sit putrescens , acris & alcalina , pree-
terlabendo has partes , & multo magis iis incum-
bendo , rodit & irritat. Verum partibus illis
novae huic urinae paulatim assuescentibus , atque
ipsâ calculi superficie simul emollitâ , imminuun-
tur iisdem gradibus dolores supra memorati , &
post aliquot septimanias prorsus cessare solent.
Quod si dolor vehemens urgeat , imperanda est quies-
omni-

omnimoda, situs corporis conveniens, venaesectio, victus lenis, mucilaginosus, oleosus, Semicupia, Fots, Cataplasmata, Linimenta, Enemata appropriata, & praecipue medicamenta ex opio praeparata. Sed raro contingit, ut aliquid facto opus sit, praeter ea, quae dolor ipse suadet, quietem scilicet & situm corporis convenientem. Imprimis autem monendus est aeger, ne isto dolorum augmento territus statim absistat ab usu remediorum. Cum enim calculus non raro deveniat scaber & summopere inaequalis ab eorum actione, si pristinam duritiem rursus induat, quod certo certius fiet urinâ ad pristinum statum per intermissa remedia revertente, immanissimi dolores invadent; id quod miserrimo exemplo cujusdam *Thomae Underwood* biennio circiter abhinc extincti patuit, ut infra narrabitur. Dum e contrario multoties observatum fuerit, aegrum remediorum usui pertinaciter insistendo motui cuivis mediocri perfrerendo habilem redditum fuisse, & symptomatis omnibus tantum non immunem evasisse, quamquam magnus adhuc & scaber calculus restaret in vesica; uti ex fragmentorum postea egestorum numero & scabritie constabat; mollitie scilicet fragmentorum & calculi ipsius illud efficiente.

Multa apud Auctores memorantur calculi vesicae signa, sicut probè nostis. Liceat mihi notabiliora feligere. Sunt autem pruritus & dolor in collo vesicae, urethrâ & glande penis; praecipue statini post urinam redditam. Eadem aucta a motu quovis violentiori, imprimis dum equo vel curru vehitur aeger per vicos lapideos, mittu sanguineo comitante. Frequens, dolorifi-

cus , & plerumque irritus mejendi conatus. Tennesmus eodem tempore infestans. Urinae fluxus subito interceptus , tanquam ab obice interposito , sed revera proveniens , meâ quidem sententiâ , a subitâ contractione sphincteris ab impatto calculo irritati. Verum operae pretium erit , aegrum calculo vesicae laborare existimatum , se se examini per catheterem subjicere , quod omni vacat periculo , & fere omni molestia. Invento enim per catheterem calculo , aggredietur usum remediorum majore cum animi constantiâ. Sin minus , poterit tamen fortasse aliquid lucis , quod ad symptomatum causam , ab hoc examine mutuari. Observandum autem est , ubi omnia signa praecedentia convenient , vix ullum scrupulum oriri debere , ex eo quod catheteri non occurrat calculus inter explorandum , nam hoc subinde fit , existente interim calculo in vesicâ : Signa vero illa sibi mutuo fidem facientia rarissime fallunt , fortasse nunquam.

Non tam clarè constat , quâ ratione dignoscendus sit calculus renum , & multo minus , quibus symptomatum differentiis distinguendi sint maiores a minoribus illis , quorum moles est tantilla , ut per ureteres in vesicam deferri possint. Si autem aeger tentetur crebris lumborum doloribus , ad motus violentiores auctis , cum mictu sanguineo , adsintque fere perpetuo calor & sensus gravativus ibidem , si vomituriat subinde , urinamque frequenter reddat , necesse est omnino , ut ad haec remedia se conferat sine morâ. Ubi enim maiores adsunt in renibus calculi , vix dici potest , quanto objicitur periculo , qui medicamento

mento lithontriptico destituitur, utpote quem existibilis illa Ischuria, ab obturatione ureterum ortum ducens ex levissimâ occasione invadere sit parata. Aegro autem his remediis per tempus idoneum uso, & etiamnum sine intermissione utente, decidant licet in ambos ureteres calculi, omnemque transitum urinae praecludant, fragiles tamen erunt & quodammodo molles eorum superficies, vis urinae solvens perpetuum ex illius morâ incrementum capiet, ipsaque perpetuò urgebitur momento majori ex quantitate suâ perpetim auctâ, partiumque adjacentium contractio-ne, & sic tandem sibi ipsi viam faciet. Cui suffragatur, quod nullum exstat exemplum Ischuriæ lethalis inter usum remediorum oborti. Sed & ipsa urina naturalis nonnunquam, licet raro, canales in calculi lateribus efformat, per quos cum bonis aegri rebus elabitur.

Nec animadversione indignum est, multum conducere haec remedia ad casus obscuriores illustrandos. Cum enim tantâ vi solvendi prædicta sint, fieri vix potest si revera adsit calculus, quin fragmentum aliquod cum urinâ redditum, vel insigne levamen ex emollitâ calculi superficie proveniens huic fidem ficerit; ideoque, neutro illorum apparente post haec remedia per tempus justum assumpta, probabile erit, calculum non adesse. Quod si fragmentum vel minimum per urethram prodierit, hoc certissimo erit indicio, calculum alicubi latitare in partibus urinariis, cum urinae medicatæ vis solvens nullo modo patiatur, concretionem aliquam de novo generari. Magnitudo, color, forma, durities fragmenti egesti non-

nonnihil forsan de calculi ipsius, a quo separatum fuit, naturâ & magnitudine monstrare possunt, praesertim ubi simul conferentur experimenta infrâ recensenda. Si dolor in regione ureteris fragmenti exitum præcesserit, conjicere licet, e rene provenire; sin minus, e vesicâ, praesertim verò si fuerit magnum, latum vel angulosum.

Quod ad casus leviores attinet, ubi nimirum vomitu, lumborum doloribus & fabuli vel lapillorum fabulosorum transitu per ureteres dolorifico subinde vexantur aegri, nec tamen calculo renum laborare videntur, propter omnimodam symptomatum absentiam per intervalla, convenit, remedia quantitate ex antedictis aliquâ exhibere per septimanas aliquot, ne fortè lateat quidam calculus major, atque etiam, ut, quicquid adest fabuli vel lapillorum fabulosorum, evacuetur. Postea generatio horum omnino prohiberi potest quartâ, quintâ vel sextâ parte quantitatis illius quotidiè assumptâ; quae usque continuanda est, vel subinde omittenda & deinceps repetenda, pro ratione symptomatum. Victus emolliens, cum mellis esu assiduo & copioso, idem praestare potest in plerisque casibus.

Accidit nonnunquam, ut haec remedia assumentes post aliquod tempus multo habitiores fiant, & ejusmodi symptomatis tententur, quæ a boni sanguinis Plethora oriri solent, remediis scilicet nimiam hujus copiam ingenerantibus, aut per se, aut propter cibi appetentiam, a lenitis doloribus auctam. Quod si fiat, mitti potest sanguis, vel lene catharticum subinde exhiberi: Masicilentis

cilentis autem , languidis , ictericis & podagrlicis valde proficia sunt ut plurimum haec remedia , etiam nullâ ratione habitâ levaminis , quod a calculi sublatione provenit.

Hae sunt praecipuae circa hanc Methodum monitiones & cautelae ; ex ipsâ quidem praxi maximam partem desumptae , sed & practicis insuper rationibus munitae , concessâ modo urinae medicatae vi solvente. Et certò scio , futurâ aliquot annorum experientiâ meam fidem satis superque liberatum iri. Verum quo vestris , miserorumque , vestram opem implorantium , votis plenius satisfaciam ; libet jam adjicere summa illorum argumentorum capita , quibus haec vis evinci queat. Reduci autem possunt ad quinque classes , utpote petita vel

Primi , Ex cessatione Symptomatum usum remediorum consecutâ. Vel

Secundi , Ex catheteris testimonio , cuius operi nimirum in casibus nonnullis calculus inventus est ante assumpta remedia , post assumpta vero inveniri non potuit. Vel

Terti , Ex Phaenomenis calculorum , e cadaveribus post assumpta remedia exemptorum , notisque lithontripticae virtutis manifestas gerentium. Vel

Quarti , Ex urinae medicatae qualitatibus , & vi solvendi calculos in illa digestos extra corpus. Vel

Quinti , Ex simili vi , ipsis remediis , sive , quod eodem recidit , *Lixivio saponis & aquae calcis* competente.

Primo itaque exhibita fuere haec remedia aegris quam plurimis , calculo vesicae laborantibus , uti ex signis supra recensitis colligere licet , quandoque etiam catheterem patuit , exitu felicissimo. Doloribus enim & Symptomatis omnibus liberati sunt , & ad motus quosvis vitaeque functiones prorsus ut olim peragendas apti evasere. Quinetiam nonnulli , licet numero longe pauciores , quibus calculi majores in renibus haerere visi , sanitati exinde restituti sunt. Historias quidem hujusmodi multas , ab ipsorum aegrorum epistolis vel ore desumptas , biennio circiter abhinc evulgavi linguâ vernaculâ , testimonium suum simul conferentibus compluribus viris probus , eruditis , judicii acris , magni nominis.

Cum itaque & pulvis & sapo vias urinarias vehementer irritare soleant , omnem prorsus dolorem auferre vix possunt , nisi propter ablatum simul calculum , vel saltem ejus superficiem valde emollitam , certum virtutis solventis indicium. Verum permanens doloris & Symptomatum omnium cessatio , per annos aliquot ab intermissis remediis , soli priori causae , calculo nempe integre soluto & e viis urinariis prorsus ejecto , convenire posse videtur. Pari saltem jure inferre liceret , remedia haec calculum tollere , hoc est solvere , quo *Cortex Peruvianus* , cuius virtus febrifuga a Symptomatum cessatione unice arguitur , febris intermittentis causam amovere affirmatur , modo paria essent utrobique felicis eventus exempla. Jam vero Symptomatum calculi ex usu *Lithontripctici* cessantium exempla non possunt esse valde numerosa , propter ejus novitatem ;

tatem ; hoc tamen attestari queo , ex ducentis circiter aegris , quorum Historiae mihi bene perspectae sunt , quibus Symptomata calculi rerum aut vesicae genuina adfuere , quiique quid revera praestare valent remedia experti sunt , neminem haec tenus mihi innotuisse , quem non oporteat credere aut integre sanatum fuisse , aut certe sanari potuisse , modo justâ quantitate , ritu & temporis spatio hausta fuissent remedia , nec ipse aeger morbo alias insanabili laborasset . Quocirca ex hoc simplicissimo & primario in re medicâ argumentandi genere colligere licet , virtutem lithontripticam horum remediôrum non longè distare a virtute febrifugâ Corticis Peruviani , quod ad gradum certitudinis . Idem enim quâm proxime oritur gradus certitudinis ex centum exemplis claris & appositis , ac si adessent centum mille , ut a doctrinâ fortis mensurandae demonstari posset , nisi per se satis pateret . In utroque nimirum casu ad certitudinem , quod aiunt , absolutam quâm proxime acceditur .

Quod si objiciatur , differentiam non praetermittendam subesse inter virtutem lithontripticam & febrifugam , propterea quod causa Symptomatum calculi , hoc est calculus ipse , evidens est , incurrit in sensus , audiri , tangi potest , dum interea multum ambigitur inter doctos de causâ febris intermittentis ; ideoque exspectandum esse , ut remedium lithontripticum causam hanc sensibilem sensibili modo tollat , ut laminae & fragmenta , characteribus solutionis ex parte perfectae scatentia , vel materies calculosa , sub formâ pulveris tenuioris reddantur cum urinâ , & tan-

tandem ipsi nuclei prodeant. Respondeo , hoc quidem expectari posse summo cum jure , sed & fieri ; fieri porrò adjunctis vel minutissimis circumstantiis , quas in Historia calculi versatissimus comitari debere affereret ; unde statim patet , multum roboris ad conclusionem nostram stabi-liendam exinde accedere. Redduntur utique laminae & fragmenta , quod ad magnitudinem & formam diversissima ; prorsus ac si in mortario confractus , & crasso modo pulveratus esset cal-culus , nisi quod albeant , mollia sint & cariosa ut plurimum , hoc est , ex parte solvantur : namque calculorum albedinem notam esse solutionis inchoatae , patebit infra experimentis variis ; mol-litiem verò & cariem , omnibus liquet. Lami-narum superficies altera convexa est , altera con-cava ; albet verò illa magis quam haec , utpote urinae medicatae virtutem diutius experta. Red-duntur nonnunquam particulae nigrae , rotun-dae , instar seminum sinapeos , quas quidem a calculo moriformi provenire credibile est. Red-duntur etiam , licet rarius , rubidae , fuscae , in-signi duritie praeditae , pro diversitate scilicet cal-culi & ipsius urinae medicatae. Tandem pro-diit nucleus , coopertus particulis ejusdem gene-ris ac illae , quas ultimò aeger reddidit ; scaber & cariosus , vel fortasse laevis & expolitus ; in-teger vel fractus ; unus vel plures ; evanescenti-bus deinceps omnibus omnino Symptomatis. Haec plerumque accidunt , fuere tamen nonnulli ; qui-bus Symptomata fugata , solo nucleo prodeunte; pauci , ne hoc quidem conspecto. Nam turbi-da solet esse urina medicata , & particulis terreis

a calce derivatis abundare, quibus calculus, si
eâ sit naturâ ut in pulverem tenuem solvatur,
commixtus visum effugit.

Illi porro, quibus valde emollita prodeunt
fragmenta, ut & quibus brevi tantum spatio cal-
culum adfuisse probabile est, brevi ut plurimum
convalescunt. Sic etiam vesicae calculus, caete-
ris paribus, promptius solvi videtur quam renum;
eo quod vesicae calculus maceratur in urinâ sol-
vente ibidem detentâ, dum interea calculus re-
nalis praeterlabenti urinae solummodò expositus
solvitur lentius. Pari ratione generatur lentius,
hoc est, rarius occurrit; adeoque multo rariora
fiunt (uti supra annotatum fuit) calculi renum
soluti exempla, quam vesicae, propter hanc du-
plicem causam, quod & rarius adfit, & diffici-
lius solvatur. Attamen nonnullis revera solutum
fuisse, omnino credendum est; existit enim,
qui facti sunt abunde consci transitus particula-
rum disjunctarum, & tandem nuclei ipsius,
per ureteres. Nec contemnendum est virtu-
tis solventis argumentum, quod fabuli & lapillo-
rum fabulosorum e renibus primum, deinde e
vesicâ ejectioni doloribusque exinde ortis obno-
xii, nihil tale patientur inter usum remediorum,
concretione nimirum particularum fabulosarum a
novis urinae medicatae qualitatibus praepeditâ.

Quod ad casus imperfectiores attinet, quo-
rum scilicet Historiae nondum mihi satis inno-
tuerunt; vel ubi usus remediorum brevi abruptus,
aut continuatus quidem, sed prorsus in-
constanter, & in brevibus accipiendo temporibus
sine regimine necessario; vel denique ubi meri-

tò suspicari licet calculum revera uon adfuisse; serio affirmare possum, me nihil exindè colligere valere, propter quod remedia ab aequo rerum aestimatore censenda sint aut virtute solvente destitui, aut aliquâ qualitate noxiâ praedita esse, benè multa verò & eorum efficaciae & usui innocuo suffragantia. Interim in hoc, ut in omni alio Problemate resolvendo, a simplicissimis & certissimis incipiendum est, ut sic tandem intricatiora enodari queant, & lux obscuritati affundi.

Sequitur ergò, remedia haec sibi ipsis fidem facere ratione singulari, nec omnino refellendà; quandoquidem tum Symptomatum causam, tum proprium agendi modum, detegant & stabiliant. Quî enim fieri potest, ut non adfuerit calculus, cum in conspectum prodeat? Ut non solvatur, cum prodeat non integer, sed partibus cohaesionis vinculo solutis, colore item & molitie vim sibi impressam testantibus?

Secundum argumenti genus desumptum est a catheteris testimonio, hoc est ab iis, quibus catheterē inventus est in vesicâ calculus ante assumpta remedia, post assumpta verò inveniri non potuit. Hi sunt numero septem, multò plures futuri, ut videtur, si explorandi ante & post data fuisset copia. Singulorum Historias breviter percurram.

Thomas Holland, annos quinquaginta vel amplius natus, calculi vesicae Symptomatis laboraverat per triennium. Nec ambulare, nec curru vel equo vehi potuit, sine vehementi dolore & miętu sanguineo. Autumno anni 1737. catheterē inventus est in vesicâ calculus. Sumpsit remedia per

per sex circiter menses , reddiditque complures calculi laminas , fragmentis testarum ovorum similes , ex altero latere albas , ex altero fuscas ; multas item particulas albas & emollitas , & tandem nucleus ingentem . Evanuere omnia prorsus Symptomata , nec sensit vel minimam molestiam , curru licet raperetur per vicos lapideos summâ cum celeritate , deditâ scilicet in hunc finem operâ . Explorata est etiam ter denuò cathetere vesica , nec tamen calculus inventus .

Ricardus Cheshire , natus annos 73. , calculo vesicae laboraverat per quadriennium . Catheteri hujus vesicae saepius immisso , ad exitum urinae faciendum , occurrebat calculus , sentientibus non modo Chirurgo & Chirurgi Discipulo , sed ipso etiam aegro & filio ejus ; visusque est Chirurgo permagnus . Incepit uti remediis Octobr . 24°. 1738. , & in iis persistit ad mensis insequentis 27. ^m , redditâ per hoc tempus materiae calculofae quantitate ingenti , sub specie cinerum , ut ipsius verbis utar . Fugata sunt omnia prorsus Symptomata , & explorata cathetere ter denuò vesica ; sed calculus inveniri non potuit

Arthurus Gardiner , sexagenarius , calculi vesicae Symptomatis laboraverat per annos complures , urgentibus doloribus vehementissimis . Explorata est cathetere vesica Decembr . 30°. 1738. , & calculus ibidem inventus . Usus est remediis per menses octo , reddidit quām plura calculi fragmenta emollita , tum parva tum magna , & liberatus est ab omnibus Symptomatis . Cathetere bis denuò explorata est vesica , sed calculus non inventus . Observatu dignum

est, hunc aegrum a doloribus immunem evasisse intra mensis unius spatium a primâ remediorum assumptione; quamvis fragmentorum mollium scabrorum copia posteâ reddita certissimo sint indicio, & magnum & scabrum calculum, sed emollitum, tunc temporis restitisse in vesicâ.

Petrus Appleton, annos natus 67., calculi vesicae Symptomatis laboraverat per septennium & amplius, comitantibus doloribus summopere excruciantibus per ultimum quinquennium. Cathetere explorata est vesica Jul. 6°. 1739., & calculus inventus. Sumpsit remedia quinque circiter menses, reddiditque quâm maximam calculofae materiae quantitatem sub formâ laminarum & fragmentorum minorum, nucleo parvo tandem prodeunte. Evanuere omnia Symptomata, & cathetere bis denuo explorata est vesica, sed calculus non potuit inveniri.

Henricus Norris, annos natus 55., calculi vesicae Symptomatis laboraverat per annum cum semisse. Cathetere explorata est vesica, & calculus inventus. Sumpsit remedia per menses quatuor, reddiditque urinam turbidam, sed nulla calculi fragmenta, quod quidem sciverit. Liberatus est autem ab omnibus Symptomatis, explorata quoque denuo cathetere vesica, sed calculus non inventus.

Gulielmus Brighty, natus annos 79., calculi vesicae Symptomatis laboraverat per triennium. Cathetere explorata est vesica Sept. 8°. 1739., & inventus calculus. Sumpsit remedia quatuor circiter menses, reddiditque calculi fragmenta

quæ-

quaedam, cum multis granis parvulis, instar seminum sinapeos, a calculo moriformi provenire visis. Evanuere omnia Symptomata, & cathetera denuo explorata fuit vesica, nec calculus inventus.

Rusticus quidam, nomine *Brown*, intra 40. & 50. aetatis annum ut videtur constitutus, calculi vesicae Symptomatis loboraverat per biennium. Autumno anni 1738. cathetera explorata fuit vesica, calculusque inventus. Sumpsit remedia menses circiter duos, & tandem reddidit calculi fragmenta quatuor, granis tritici magnitudine paria. Evanuerunt illicò Symptomata, & cathetera explorata est denuo vesica, anno circiter interposito, sed calculus non inventus.

Praetermissis itaque quae ad argumentum praecedens pertinent, circumstantiis, affero catheteris Testimonium seorsim spectatum magnopere valere ad lithontripticam urinae medicatae virtutem stabiliendam. Cum enim raro accidat, ut calculus semel cathetera inventus non occurrat denuo, praesertim ubi summâ cum curâ & circumspectione, a peritissimis etiam in arte suâ viris, instituitur examen, id quod in his casibus factum est; incredibile videtur, illud septies contingere potuisse, nisi propter solutum uni saltem aegrorum calculum. Verbi gratiâ, si sit in ratione 9. ad 1. hoc eventurum non esse in casu singulari, erit in ratione 9, 999, 999. ad 1. ut idem septies non accidat, ceu computo inito statim patebit.

Verum non reticendum est, duobus insuper aliis aegris cathetera exploratam fuisse vesicam &

DISSE TATIO

ante & post remediorum assumptionem , atque in his eventum non respondisse votis ; adeo , ut oporteat nonnihil demere a gradu probabilitatis , septem Historiis jam recitatis oriundo , si solae essent , in quibus catheteris experimentum institutum.

Horum primus , *Abrahamus Ravenell* , calculi vesicae Symptomatis laboraverat per annos aliquot , miserrimam trahens vitam , & tum ambulare , tum curru vehi impos p[re]a dolore. Cathetere explorata est vesica sub finem Martii 1738. , & inventus calculus. Incepit statim uti remediis , & per primas duas septimanas multo pejus se habuit quod ad dolores , obstructionem urinae & mictum sanguineum. Post hoc levatus fuit , & negotia obire subinde potis erat sine dolore. Reddidit etiam urinam turbidam , & mucosam , cum fabulo rubro. Die 49°. ab inceptis remediis foris mejenti orta est urinae interceptio subita , non tamen dolorifica. Paulò post derepente erupit urina , fluxitque libere ad magnam quantitatem , adeo , ut visum fuerit aegro , nucleum tunc temporis evacuatum fuisse. Continuavit autem usum remediorum per unam amplius septimanam , sed , cum omni prorsus dolore se liberum sensit , urinam quoque suam pellucentem & sine impedimento redditam , destitit ab iis. Quin etiam adiit Chirurgum , à quo calculus anteà inventus fuerat , & se examini catheteris rursus subjicit bis eodem die , variato etiam corporis situ , alterā quippe vice stetit eretus , alterā decubuit super mensam. Chirurgus nequivit calculum invenire. Elapfis aliquot diebus

diebus tertio exploravit aegri vesicam idem Chirurgus, pari item eventu. Cum autem adduxisset Chirurgum alterum in hujus rei testem, & tradidisset illi Catheterem, occurrit illi alteri calculus; quin & Chirurgus primus tum demum deprehendit, calculum adesse in vesicâ. Permanet interea calculosus hic ad praesens usque tempus, per annos utique duos cum semisse, omnibus calculi Symptomatis immunis, motumque quemvis ambulationis, equitationis, vel ventionis in curru super vicos lapideos, tolerare potest prorsus sine incommodo.

Secundus, *Benjaminus Towne*, laboraverat veris calculi vesicae Symptomatis per menses tantum aliquot. Explorata fuit cathetere vesica mense Maio anni 1737., & calculus ibi inventus. Sumpsit remedia per septem circiter menses, reddidit compluria calculi fragmenta, inter quae duo permagna, & liberatus est ab omnibus Symptomatis. Octobr. 9°. 1738. explorata est denuo cathetere vesica, & calculus inventus. Ambulare autem, equitare, motumque quemvis perferre potis est ad hoc usque tempus, triennii circiter intervallo a Symptomatum cessatione remotum, omni sine dolore vel molestia, neque adest aliquod calculi signum.

Hisce novem aegriss, quibus solis hic in *Anglia* explorata est cathetere vesica ante & post remediorum assumptionem, liceat decimum adjicere, ex cuius Historiâ non minus roboris ad evincendam urinae medicatae vim lithontripticam deduci queat, ut videtur, quam si adesset illi testimonium catheteris.

Thomas Binford, Mercator *Exoniensis*, cui puerο adhuc decenni exsectus fuerat e vesica calculus, iterum correptus est genuinis calculi vesicae Symptomatis circa annum aetatis suae vicesimum, vel vicesimum quintum, eaque deinceps perpeccus est per annos sex. Chirurgus celebris *Exoniensis* bis immisit digitum in anum aegri, sensitque evidentissime utrāque vice calculum in vesicā, ovo gallinaceo magnitudine aequalē. Ipse porrò aeger agnovit motum calculi in vesicā suā durante utroque examine, reddiditque urinam cruentam statim post horum alterum. Augusto anni 1737. inchoavit usum remedium, & brevi post tempore rejicit cum urina magnam quantitatem fabuli fusci, putridique, ut & quā plurimas calculi laminas albas. His paulatim evacuari desinentibus, provenerunt cortices, ut ita dicam, calculosi, utpote qui crassi erant, & laminis pluribus constabant. Fuēre etiam illorum plerique lati, formā irregulari, superficie albi, hāc detersā fusci. Tandem prodierunt partes ipsius nuclei fragiles & porosae, fugatis tum demum omnibus Symptomatis. Immisit quoque idem Chirurgus digitum in aegri annum tertiarū vice, sed non invenit calculum.

Has decem Historias retuli ideo libentius, ut habeatis specimen exemplorum, quibus tanquam fundamento suo nititur gradus ille certitudinis, quem ad certitudinem absolutam quam proximè accedere superius asseveravi.

Cum enim quibusdam ex his historiis, quarum similes fere semper occurunt quando remedia rite assumuntur, vix una e centum vel mille, quibusdam

dam nullae omnino pariles reperiantur ubi nihil assumitur; fieri non potest, quin, casu prorsus excluso, virtus solvens a remediis in urinam derivata arguatur ex his Historiis, eadem ratione, qua aliarum causarum existentia ex effectibus suis manifestis; gradusque certitudinis inde deducendus ad unitatem, sive certitudinem absolutam, quam proximè accedat.

Accedo jam ad tertium argumentorum genus, quod nimirum petitur ex Phaenomenis calculorum, in cadaveribus post assumpta remedia inventorum, notasque virtutis lithontripticae manifestas gerentium. Horum aliquos aere incidentes curavi, ut clarius appareat, quantum roboris ad conclusionem nostram firmandam ex hoc loco derivetur. Sequens utique Tabula exhibet calculos exemptos e quinque cadaveribus post assumpta remedia demortuorum.

Fig. 1. & 2. designant latera opposita calculi exempti e vesica *Thomae Unterwood*. Laboraverat ille per annos aliquot. Aestate anni 1738. aggressus est usum remediorum, persistit in eodem, sine requisita tamen constantia, per sex circiter menses, reddidit fragmenta bene multa, & aliquid levaminis exinde accipere visus est. Post hoc destitit ab iis prorsus, exactoque intervallo aliquo correptus est doloribus summopere excruciantibus, in sequente etiam Diarrhoea, quae hominem miserrimum sustulerunt post tres circiter menses ab intermissis remediis. Aperto cadavere inventus est in vesica calculus, tertiam vel amplius partem exesus, apparente ipsa laminarum

narum serie multis in locis , & foramine pervio a parte dextra.

Fig. 3. & 4. designant latera opposita calculi defumpti è vesicâ *Ricardi Symonds*. Natus erat annos 78., laboraverat per triennium , eratque senio , paralysi , diarrhoea & torminibus calculi tantum non confectus. Sumpsit remedia per sex fere septimanas , sed quantitate solita minori ob diarrhoeam & debilitatem magnam. Reddidit interea multas calculi laminas cum urina , cuius sedimentum simile erat udo caemento , & ab omnibus fere doloribus , Symptomatisque calculosis se liberatum esse sensit. Desit itaque remediis uti , vitamque dein trahens summopere languescentem , sed doloris propemodum expertem , per dies quatuordecim , tandem placide obiit. Aperto cadavere inventus est in vesica calculus magnus , ex parte tanquam decorticatus. Cortex residuus scaber erat , & plus digiti parte octava crassus multis in locis ; sed tanta erat ejus mollities , ut manibus contrectari nequiret quin detereretur ; ex quo factum videtur , illum a doloribus adeo immunem permanisse per ultimas vitae suae hebdomas. Coopertus est etiam calculus hic lamina pertenui , coloris ex rubro fuscî , quam ab urina statum incrustantem rursus adepta propter intermissa remedia provenisse verisimile est ; namque hâc detritâ partes substratae albere visae sunt , uti solent quae in urina medicata macerantur.

Fig. 5. & 6. denotant latera opposita calculi exempti è vesica *Robert Wood*. Sumpsit ille remedia per annum circiter dimidiatum , reddidit fragmen-

fragmenta quaedam, & paulo melius se habuit, quod ad dolores a calculo oriundos. Extinctus est pleuritide. Erat autem senex annorum 68., debilis & asthmaticus. Modus, quo calculum hunc comiminuebat urina medicata, plane singularis est; ab altera enim parte detritus & expolitus est in fastigium acutum, apparente lamina- rum serie ovali ex utroque latere; ab altera ve- rò fere intactus restitit.

Fig. 7. denotat calculum desumptum e vesica viri honorabilis *Eduardi Carteret*, Veredariorum publicorum Praefecti generalis: 8. & 9. eundem in partes duas ferra divisum; 10. & 11. nucleum cum portione corticis calculi alias in ejusdem vesica inventi. Sumpsit ille remedia per sesquiannum vel circiter, reddidit quam plurima calculi fra- gmenta & aliquot nucleos, multumque levami- nis exinde accepit. Tandem verò abstitit ab iis, reclamante licet *Inventrice*, & afferente, il- lum nondum integre sanatum fuisse. Biennio post extinctus est morbo apoplectico; aperto au- tem cadavere, hi duo calculi in vesica inventi fuère: Calculus 7., ferra divisus in partes 8. 9., exhibuit corticem durum, fusco - pallidum; nu- cleum verò ab hoc cortice prorsus distinctum, in eo mobilem, cinereum, molliorem. Calcu- lus alter concussus sonitum dedit; cum verò for- te decidisset in pavimentum lapideum, diffractus est, statimque apparuit nucleus 10., cum corti- ce, cujus pars est 11., uterque prorsus ejusdem generis cum prioribus. Ex his concludere licet, nucleos illos restitisse in vesica, cum remediis uti desit; cortices verò generatos fuisse per residu- um

um vitae suae biennium , postquam urina rediis-
set ad statum naturalem incrustantem propter
intermissa remedia.

Fig. 12., 13., 14., 15., 16., denotant calculos
quinque angulosos , habentes latera plana , ex-
politæ , laminarum serie circulari distincta. In-
venti sunt in vesica *Joannis Stanton* , senis se-
ptuagenarii , qui extinctus est morte repentina ;
postquam sumpserat remedia duos circiter men-
ses , reddiderat laminas quasdam , atque multum
levatus fuerat. Jam verò , cum calculi omnes
increscant per orbicularem laminarum appositio-
nem , laminis exterioribus undiquaque obtegenti-
bus interiores ; liquet , hos , in quorum lateribus
varii laminarum ordines simul sunt conspicui , fa-
bricaque interna nudata , fuisse decrecentes per
aliquod tempus ante mortem. Forsan prius emol-
liti ab urinâ medicatâ , postea derasi fuere & com-
planati a mutua attritione.

Quarta classis argumentorum derivatur ex urinæ
medicatae qualitatibus , & vi solvendi calcu-
los in illa digestos extra corpus. Hic autem ne-
cessè erit , brevem quorundam , ad me ipsum
spectantium , Historiam praemittere. Ineunte an-
no 1737. , aetatis meae tricesimo secundo , cor-
reptus sum veris calculi vesicae signis , pruritu
scilicet & dolore in collo vesicae , ad motum
etiam auctis , cum mictu sanguineo , subita inter-
ceptione urinæ & tenesmo. Cathetere explorata
est vesica , sed non inventus calculus. Cum ve-
rò Symptomata praedicta soli vesicae calculo re-
spondere viderentur ; circa initium Maji ejusdem
anni aggressus sum usum horum remediorum ,
&

& in eo perstitti ad hunc usque diem. Quamvis enim iisdem Symptomatibus etiamnum afficiar; imminuta tamen est eorum vehementia, reddidique saepe saepius laminas calculosas, fragmenta etiam, tum parva, tum magna, (inter quae unum ponderis granorum $12\frac{1}{2}$) solida, scabra, notis lithontripticae virtutis certissimis insignita, quorum unquam mihi nihil contigit ante assumpta remedia. Spero itaque, imo, Deo annuente, confido, me tandem convaliturum, utut in spatium usitato longius excurrat tempus sanationi absolvendae requisitum. Nec dolorum, qui quidem praeter solitum mites huc usque extiterunt, omnino pigebit, si modo occasionem praebuerint sublevandi miserrimos illos mortales, qui sub tortura calculi ubique gemunt. Addendum est, suspicari me, calculum adfuisse in vesica, forsan in rene altero, vel etiam in utroque, a multis retro annis; ut &, Autumno anni 1738. cathetere bis denuo exploratam fuisse vesicam, inventumque utraque vice calculum.

Sub primum igitur horum remediorum usum observavi, urinam meam naturali magis volatilem fieri, odore veterem urinam putrescentem referre, atque reddi valde alcalinam; effervescebat enim cum oleo vitrioli, oleo sulphuris per campanam, spiritu nitri, spiritu salis marini, aceto & succo limonum. Quae quidem omnia aliis, haec remedia assumentibus, communia sunt. Celeberrimus porro *Chemicus Parisiensis*, *Claudius Josephus Geoffroius*, nactus est salem mirabilem *Glau-beri*, hoc est salem neutrum, ex urina medicata oleo vitrioli permista; quod est certissimum ar-

gumen-

gumentum , salem alcalinum acido neutralizando parem contineri in urina medicata. Causae autem , propter quas *sal mirabilis Glauberi* , non *tartarus vitriolatus* , oriatur ex hoc processu , videntur esse : primò , quod sal marinus solet aſſumi quotidie inter edulia ; deinde , quod sal alcalinus , in *sapone Alicantico* confiendo usurpatus , fit ex cineribus plantarum , in littoribus maris *Mediterranei* nascentium , & aqua marina subinde irrigatarum.

Nec mirum videri debet , urinam medicatam esse valde alcalinam , sive sales alcalinos saponis , tanta quantitate per os ingesti , transire , vel integrè vel magna ex parte , per vias urinarias . Namque ea est renum functio peculiaris , ut aqueas partes sanguinis , salesque in illis solutos , a reliqua massa fecernant . Volatilitas urinae medicatae Phaenomenon est ejusdem generis , ac volatilizatio fali ammoniaci & a calce viva & ab alcali fixo . Putrescentia autem magnam cum indole alcalina & volatilitate cognitionem habet .

Dubitari quidem potest , an calx testarum ovoidum quicquam conferat , nec ne , ad alcalinam indolem urinae medicatae imprimendam . Etenim spiritus fali ammoniaci cum calce viva paratus non est alcalinus . Colligere tamen videor ab experimentis quibusdam crassioribus , urinam medicatam esse magis alcalinam , quam pro ratione salium alcalinorum , in sapone quotidie assumpto contentorum . Forsan hujus rei ratio petenda est a perpetua illa fluidorum , per corpus animale circumactorum , propensione in naturam alcalinam .

Jam

Jam vero tres illae urinae medicatae qualitates, nempe indoles alcalina, volatilitas & putrefcentia, non levem virtutis solventis suspicione movent. Est enim notissimum, sales alcalinos praeditos esse vi solvendi oleum, quod proximulo frequentissimo cohaesione corporum haberi solet. Hujus rei exemplum peti queat ex linteis albatis. Elicitur utique, ope lixivii alcalini, oleum vegetabile ex illorum fibris, textura quodammodo solvit, & ex fuscis alba fiunt, pari ratione ac laminae calculosae, ab aegris haec remedia assumentibus evacuatae. Volatilitas indicio est, partes urinae intime comminui, a se invicem recedere conari, concrescendo & incrustando ineptas reddi, penetrando aptas. Putrefcentia demum est species quaedam solutionis, & in corporibus contiguis facile propagari solet. Nequè defunt experimenta, in ipsam naturalem urinam putrefcentem a viris doctis instituta, & mecum communicata, quae huic doctrinae favent. Quid? quod & a Viro celeberrimo *Stephano Halefio S. T. P.* jam pridem observatum fuit, magnam interesse analogiam inter tartarum vinorum, tartarum aquarum mineralium, sive crustas lapideas ab aquis mineralibus ortas, fundoque & lateribus valorum continentium adhaerentes, & tartarum urinae sive calculum humanum. Vinum autem in acetum vergens, hoc est a pristina natura degenerans & quasi putreficens, absunit tartarum suum, uti satis notum; aquae item minerales putrefcentes suas crustas lapideas, id quod ab eodem Viro perspicacissimo didici; quidni ergo continuetur Analogia inter regnum minerale, vegetabile

tabile & animale , uti folet esse persaepe , calcusque humanus solvatur ab urina putrescente ?

Quod si objiciatur , concessu hoc , verendum tamen esse , ne partes urinariae male multentur ab urina alcalina & putrescente ; respondeo : Primo , nihil hujusmodi aut conspectum fuisse hactenus in apertis cadaveribus posse assumpta remedia demortuorum , aut inferri potuisse ab aegrorum viventium Symptomatis . Secundò , partes urinarias melius defendi , quam calculum , nempe a muco suo , forsan non aequa refertas esse oleo animali . Tertiò , partibus viventibus inesse principium renovationis , ideoque comesas , si modo lente fiat illud , renasci assiduo pari passu . Calculus autem , pabulo suo defraudatus ob mutationem urinae inductam a remediis , simulque putrescentiam , utut lentam , in extima superficie concipiens , imminuitur usque , donec tandem evacuatur . Nescio , an non aliud observatu dignum haec ulterius persequentibus oriretur , respectu habito ad alias quosdam morbos . Sed proprio ad institutum proprium , nempe ad comprobandam urinae medicatae vim solventem intra corpus , ex eadem vi extra corpus conspicua .

Quamvis enim sub primum remediorum usum spes non contemnenda affulsit ex novis hisce urinae meae qualitatibus , imo quamvis viros quosdam fide dignissimos adeundo , & historias malorum suorum simulque levaminis accepti diligenter exquirendo , ipsa quoque fragmenta evacuata oculis perlustrando , absconum & iniquum videbatur , ultra ancipitem haerere ; mea tamen res tantoper agebatur , ut memet cohibere non possem ,
quin

quin circumspicerem undiquaque , & omnes conquirerem aut evincendi aut refellendi rationes. Institui ergo experimenta sequentia.

EXPERIMENTUM PRIMUM.

Jun. 4. 1737. Accepi calculos duos A & B , ferraque divisi utrumque in partes quatuor , formâ & magnitudine fere pares. Calculus A durus erat, ex fusco albescens, & sibi ipsi similis per omnes laminarum ordines. Calculus B. fuscus erat. Cortex illi durus , & in extima superficie parvis eminentiis distinctus ; partes autem internae fuere multo moliores. Literis A & B apposui figuras 1, 2, 3, 4, ad indicandos Liquores , in quibus horum calculorum portiones singulae digestae erant ; eo scilicet ritu , ut

A 1, B 1 denotarent calculorum A & B portiones , in aqua fluviali digestas ;

A 2, B 2 digestas in aqua fluviali , cum pulvere *testarum ovorum calcinatarum & limacum* , ad nigritiem ustorum , commixta ;

A 3, B 3 in urina naturali ;

A 4, B 4 in urina mea medicata alcalina.

Omnis has Calculorum A & B portiones digessi , per septimanae spatum , in Liquoribus suis, calore leni , quemque calori corporis humani aequal em efficere in animo erat ; fuit tamen nonnunquam major , nonnunquam minor illo , propter defectum apparatus congruentis. Liquoribus per evaporationem decrescentibus subinde novos ejusdem generis respective adjeci , simulque in statum singularum portionum sollicite in-

quisivi. Secundo utique , vel tertio , post inchoatam digestionem die observavi squamas quasdam pertenues & albas in superficie portionis A 4, easque pressione unguis facile separavi. Finita septimana exemi portiones singulas liquoribus suis , mantili detersi , & calore solis exsiccavi. Sequens verò Tabula indicat Incrementum , vell Decrementum , ponderis ab hac digestione profectum :

	Pondera ante di- gestio- nem.	Pondera post ex- ficcatio- nem.	Decrem. pond. absolu- ta.	Decr. pond. propor- tionalia..
A 1 Grana	308 $\frac{1}{2}$	304 $\frac{1}{2}$	4 . .	0, 012
A 2	276 . .	273	3 . .	0, 010
A 3	219 $\frac{1}{2}$. .	220 $\frac{1}{2}$. .	Increm. I . .	0, 004
A 4	213 $\frac{1}{2}$. .	191	22 $\frac{1}{2}$. .	0, 105
B 1	257 . .	243	14 . .	0, 054
B 2	227 . .	217	10 . .	0, 044
B 3	222 . .	223 $\frac{1}{2}$. .	Increm. I $\frac{1}{2}$. .	0, 006
B 4	212 $\frac{1}{2}$. .	190	22 $\frac{1}{2}$. .	0, 105

Patet ex hâc Tabulâ , portiones A 4, B 4, in mea urina medicata digestas , magis imminutas fuisse quibusvis aliis ;

Portiones A 1, B 1, in aqua fluviali digestas , magis imminutas fuisse portionibus A 2, B 2, quae digestae fuere in eadem aqua fluviali , pulvere *testarum calcinatarum* & *limacum* ustorum commixta ;

Portiones denique A 3, B 3, in urina naturali digestas , pauxillum incrementi cepisse.

Jam

Jam verò multum favet lithontripticae virtuti urinae medicatae , tantum decrementi ortum fuisse ab ejus actione.

Aquam fluvialem solam plùs valuisse eadem pulvere commixta , exinde profectum arbitror , quod pulvis arcte adhaesit portionibus A 2, B 2 variis in locis ; ideoque tum gravitatem eorum auxit , tum prohibuit contactum intimorem ipsius aquae.

Incrementum autem portionum A 3, B 3 Phaenomenon est ejusdem generis cum augmento perpetuo calculorum , in vesica facto. Quin etiam , portione A 3 accuratè examinata , animadverti , leminam tenuissimam & facile separabilem illi hinc inde accrevisse , quam e particulis calculosis urinae naturalis , in qua digesta fuerat, constare judicavi.

EXPERIMENTUM SECUNDUM.

Post hoc elui singulas portiones calculi A , & scopolâ detersi adeo , ut auferretur , quicquid laxè adhaereret ; Exemi partes internas molles portionibus singulis calculi B, reservatis in experimentum hoc secundum corticibus duris. Serra divisi calculos C, D, E, singulos in portiones quatuor , forma & magnitudine fere pares ; calculum F in portiones duas ; corticem calculi cujusdam albidi G in duas ; nucleum item parvum, fuscum , calculi H in duas. Apposui quoque litteris A, B, C, D, E, F, G, H, figuræ 1, 2, 3, 4, ea lege , ut

A 1, B 1, C 1, D 1, E 1, denotarent portiones quinque, in aqua fluviali digestas;

A 2, B 2, C 2, D 2, E 2, portiones quinque, in decocto saponaceo, ab *Inventrice* tunc temporis additis herbis quibusdam parato, digestas;

A 3, B 3, C 3, D 3, E 3, F 3, G 3, H 3. portiones octo, in urina naturali digestas;

A 4, B 4, C 4, D 4, E 4, F 4, G 4, H 4, portiones octo, in urina mea medicata alcalina digestas.

Omnis hae portiones digestae erant per septimanae spatium, nempe a 20°. ad 27°. Junii, eodem ac antea modo, nisi quod liquores singuli effusi fuere quotidie manè, novique ejusdem generis respectivè additi, & quod portiones omnes simul absterae erant spongia madida. Absterae sunt etiam finita digestione ad mundationem perfectam, sine vi tamen illata, & calore solis dein exsiccatæ. Ostendit autem Tabula sequens decrementum ponderis portionum singularum.

	Pondera ante di- gestio- nem.	Pondera post ex- siccatio- nem.	Decrem. pond. absolu- ta.	Decr. pond. propor- tionalia.
A 1 Grana	304 .	288 . .	16 .	0, 052
A 2 . .	272½ .	228 . .	44½ .	0, 163
A 3 . .	219 .	216½ . .	2½ .	0, 011
A 4 . .	190½ .	151½ . .	39 .	0, 204
B 1 . .	71½ .	61½ . .	10 .	0, 139
B 2 . .	68½ .	50 . .	18½ .	0, 270
				B 3

B 3 . .	$63\frac{1}{2}$. .	62	. .	$1\frac{1}{2}$. 0,	023.
B 4 . .	63	. .	45	. .	18	. 0,	285.
C 1 . .	$162\frac{1}{2}$. .	$150\frac{1}{2}$. .	12	. 0,	073.
C 2 . .	155	. .	132	. .	23	. 0,	148.
C 3 . .	132	. .	$130\frac{1}{2}$. .	$1\frac{1}{2}$. 0,	011.
C 4 . .	122	. .	109	. .	13	. 0,	106.
D 1 . .	47	. .	36	. .	11	. 0,	234.
D 2 . .	42	. .	$36\frac{1}{2}$. .	6	. 0.	141.
D 3 . .	42	. .	42				
D 4 . .	29	. .	$27\frac{1}{2}$. .	$1\frac{1}{2}$. 0,	054.
E 1 . .	50	. .	$44\frac{1}{2}$. .	$5\frac{1}{2}$. 0,	110.
E 2 . .	36	. .	27	. .	9	. 0,	250.
E 3 . .	36	. .	36				
E 4 . .	$32\frac{1}{2}$. .	$26\frac{1}{2}$. .	6	. 0,	184.
F 3 . .	30	. .	30				
F 4 . .	$23\frac{1}{2}$. .	$18\frac{1}{2}$. .	5	. 0,	212.
G 3 . .	9	. .	9				
G 4 . .	6	. .	6				
H 3 . .	3	. .	3				
H 4 . .	$2\frac{1}{2}$. .	$1\frac{1}{2}$, vel paulò plus.			

Patet ex hac Tabula , portiones calculorum multò plus imminutas fuisse ab hac digestione , quām a superiori : quod procul dubio abstersioni spongia madida magna ex parte referri debet , ex qua etiam profectum esse credo , quòd portiones , in urina naturali digestae , nonnihil decrementi acceperant. Attamen insignis illa differ-

rentia decrementorum, quibus variae ejusdem calculi portiones affectae fuere, ab hac causa oriri non potuit. Abstergio autem occasionem praebuit cognoscendi, qua ratione Liquores 1, 2, 4 potestates suas Lithontripticas exserebant. Erant utique superficies omnium fere portionum, in his tribus Liquoribus digestarum, albedine cooperatae, quae tamen facile abstergi poterat, adeo, ut portionis color idem esset, ac ante digestionem. Nonnullis insuper deciderunt laminae albæ inter absterendum, dum interim aliae exesaæ fuere in niorem favi. Ut singula percurram: portiones omnes, in aqua fluviali digestæ, albescabant, ipsaque aqua devenit quasi lactea. Portionibus A 2, A 4, C 2, C 4, F 4 & H 4 laminae albæ deciderunt. B 2, E 2, E 4 multum exesaæ fuere. D 2 parum exesa. Cortex B 4 intus quidem exesus, at superficies externa, quae parvis eminentiis distincta fuit ante digestionem, facta est laevis. Portio D 4 vix quicquam immutata est, nisi quod albesceret, cum anteà fusca fuerit. G 4 nullam omnino mutationem passa videbatur.

EXPERIMENTUM TERTIUM.

Hanc rem ulterius persecuturus arcam, tres circiter pedes longam, duos latam, sesquipedem altam, implevi arena ad altitudinem digitorum septem, & lampadem accensam subtus posui, adeò, ut calor ejus transiret in arcam per infundibulum inversum, in centro arcae locatum, & calefaceret arenam. Arena includebatur in arca

ca quadam interiore, octo digitos alta, inter quam & exteriorem intervallum erat quasi digiti transversi. Per hoc utique transfibat aër calefactus ad octo foramina, in lateribus arcae prope fundum facta, quae ad varios gradus recludi potuere, ad exitum illi plus minusve liberum concedendum. Hac ratione calor aequabilis & perpetuus haberi potest, lenis quidem, sed variis usibus aptus, & aliquantò major vel minor, pro varia distantia vasis, in quo digestio fit a centro infundibili. Affixi porro, in centro superficie internae operculi, laminam ferream stannatam, ne forte operculumflammam conciperet ex calore lampadis. Accepi dein praedictas portiones omnes, minutulis illis H 3 & H 4 exceptis, atque iterum digesti in Liquoribus suis respectivis, calore corporis humani, uti ex Thermometro patuit. Nactus sum etiam a suprà laudato Cl. *Halesio* duos calculos rotundos. Erant autem valde difficiles soluti, ceu colligere licebat ab experimentis, institutis in alios quosdam calculos, ejusdem ferè magnitudinis & formae, ex ejusdem cadaveris vesica simul cum his duobus de sumptos. Vocavi I 3 & I 4. I 3 pendebat grana 25., & digestus est in urina naturali. I 4 pendebat grana 21 $\frac{1}{2}$., & digestus est in urina mea medicata alcalina. Digestio inchoata fuit Jul. 26°. 1737. Liquores singuli effusi sunt quotidie, novique ejusdem generis respectivè affusi per totum tempus digestionis. Calculi etiam abstensi quotidiè spongia madida per decem dies primos, dein 3°. vel 4^{to}. quoque die usque ad Sept. 3^m., postea verò non omnino. Ostendit autem Ta-

bula sequens, quo die portio quaevis tantum immunita fuit, ut vel reperiri non posset, vel ob minutiam non facilè distingui a parvis fragmentis, separari solitis à reliquis portionibus.

E 2	.	.	.	Aug.	24.
D 1	:	:	:	.	27.
B 2	:	:	:	.	30.
D 2	:	:	:	Sept.	8.
B 1	:	:	:	.	9.
B 4	:	:	:	.	9.
D 4	:	:	:	.	12.
F 4	:	:	:	Sept.	24.
G 4	:	:	,	.	24.
C 2	:	:	:	.	27.
E 4	:	:	:	.	27.
I 4	:	:	:	Oct.	11.
C 1	:	:	:	.	15.
E 1	:	:	:	.	15.
A 2	:	:	:	.	15.
A 1	:	:	:	.	31.
A 4	,	,	:	Nov.	5.

Oblitus sum, diem notare, in quo C. 4 visus est absunni; memini tamen illud non contingisse, nisi sub finem digestionis.

Toto hoc tempore portiones octo, digestae in urina naturali, integrae permanserunt, atque etiam incrustatae fuere. Exemi Nov. 5°., exsiccavi, & dein ponderavi Nov. 15°. Incrementa singularum patent ex Tabula sequenti:

A 3	aucta	fuit	pondere	granorum	17 ¹
B 3	16
C 3	18
D 3	7 ¹
E 3	4
F 3	4
G 3	2
I 3	2

Modus, quo absumptae fuêre portiones reliquae, erat idem ferè ac in experimento secundo, nisi quod portiones, in aqua fluviali digestae, exefae erant pariter in morem favi post aliquod tempus, & pari passu decrescebant, ac portiones, in decocto saponis vel urina mea medicata digestae; quod D 4 & G 4 intactae videbantur per intervallum satis magnum, & tum demum e repentino putrefacteabant; & quod parvus ille ac durus calculus I 4 variis fissuris scatebat post mensis circiter digestionem.

EXPERIMENTUM QUARTUM.

Digessi diversas portiones eorundem calculorum in urinâ meâ medicatâ alcalinâ, caloribus diversis. Primus erat calor corporis humani; secundus tantus, ut manum meam vel quiescentem in eo detinere non possem. Mutata fuit utrobique urina quotidiè, portiones verò non abstergitae. Decrescebant & exefae fuêre harum pleraeque modo satis conspicuo, unaque ex iis prorsus absumpta; sed, quod mirabar, calor minor potentior videbatur majori. Fortasse quod

vas , calori minori expositum , aliquantò majus erat altero. Hae portiones non fuere ponderatae.

EXPERIMENTUM QUINTUM.

Decoxi portiones diversas eorundem calculorum in aquâ fluviali , urinâ meâ alcalinâ , & urinâ naturali , per horas quinque respectivé. Multùm imminuebantur, quae in aquâ decoctae sunt ; multùm etiam , quae in urinâ meâ alcalinâ , harumque superficies albescebant & emolliebantur. Verùm , quae in urina naturali , vix quicquam decrementi passae fuere.

EXPERIMENTUM SEXTUM.

Digessi portiones diversas calculorum eorundem in aqua fluviali , aqua stillatitia , succo expresso , & decocto *Persicariae vulgaris acris* , calore corporis humani respectivè. Vis solvens aquae fluvialis omnium potentissima videbatur.

EXPERIMENTUM SEPTIMUM.

Digessi portiones diversas calculorum desumptorum e vesica humana , e vesicis canum & ventriculis equorum , in aqua fontana , & aqua fluviali *Thamesinâ* (aqua fluvialis suprà memorata ea erat , quae ex flumine *Novo* dicto huc deducitur) , calore corporis humani respectivè. Omnes portiones calculorum humanorum integrè solutae fuerunt , reliquae verò multum imminutae ab aqua

aqua utraque , celerius tamen opere suo defun-
gebatur aqua *Thamesina* , quam fontana. Mutatae
sunt aquae quotidiè , sed portiones non ab-
sterae. Notavi porro , quosdam e calculis hu-
manis variis in locis fissos fuisse inter dissolven-
dum ; bullas item aëreas semper haesisse in su-
perficie aquae fontanae.

EXPERIMENTUM OCTAVUM.

Digessi portiones quasdam alias calculorum ca-
ninorum & equinorum , in experimento pree-
denti memoratorum , in urina naturali & mea al-
calina respectivè , calore corporis humani , sed
absque effectu sensibili ; nisi quod una ex cani-
nis , in urina mea alcalina digestis , aliquantulum
emolliri videbatur. Hae portiones nec pondera-
tae fuere , nec absterae. Mutatae sunt urinae
quotidie.

EXPERIMENTUM NONUM.

Digessi calculum renale magnum , portiones
duas ex iis , quae in urinâ meâ alcalinâ anteâ de-
coctae fuerant , ut & calculum parvum , rotundum ,
desumptum ex ejusdem cadaveris vesicâ
cum I 3. & I 4. , calore corporis humani , & urina
naturali a priori diversa. Calculus renalis &
portiones duae nonnihil imminuebantur. Calcu-
lus parvus , rotundus , nigrescebat per dies pri-
mos , sed an quicquam decrementi passus esset
nec ne , dignoscere non potui , non enim pon-
deraveram. Superficies calculi renalis evasit fra-
gilis

gilis, adeò, ut laminae magnae facile ab ea separari possent; sed non facta est alba vel mollis, sicut calculorum superficies, in urina mea alcalina digestorum. Mutata fuit urina quotidiè, sed calculi non abstersi.

EXPERIMENTUM DECIMUM.

Digessi calculum renalem, ejusdem circiter magnitudinis & formae cum priore, desumptumque ex altero rene cadaveris ejusdem, ut & calculos vel calculorum portiones duodecim diversas, in urina medicata alcalina aliis aegri haec remedia assumentis, calore corporis humani. Mutata fuit urina quotidiè, sed calculi non abstersi. Decresecabant omnes modo fatis conspicuo, portione una excepta, quae coloris erat ferrum rubiginosum referentis, & duritiei valdè insignis, uti serra patuit. Ea paulum incrementi, nempe partem circiter $\frac{1}{3}$ ponderis sui, accepit. Haec portio digesta fuit per mensem tantum unum. Quod ad reliquos calculos, visum est mihi, magis imminutos fuisse, quam si per idem tempus digesti essent in urina mea alcalina.

Omnia haec experimenta instituta fuere anno 1737.

EXPERIMENTUM UNDECIMUM.

Apr. 19°. 1739. Sumpsi portiones duas calculorum singulorum K, L, M, N; vocavi respectivè K₃, K₄, L₃, L₄, M₃, M₄, N₃, N₄, & ponderavi.

K 3

K 3	pendebat	grana	272
L 3	.	.	145
M 3	.	.	39 $\frac{1}{2}$
N 3	.	.	18
K 4	.	.	282 $\frac{1}{2}$
L 4	.	.	188
M 4	.	.	49
N 4	.	.	31

Digesti portiones K 3, L 3, M 3, N 3, in urinā naturali, portiones K 4, L 4, M 4, N 4, in urinā meā medicatā alcalinā, per septimanae spatum, calore utrobique aequali, sed quem non mensurabam exactè, quique nunc major erat, nunc minor calore corporis humani. Mutata fuit urina utraque quotidiè, sed portiones non abstergae. Apr. 26°. exenti omnes, & rufus ponderavi dum madidae erant.

K 3	pendebat	gr.	312	hoc est, aucta fuit pondere gr.	40
L 3	.	.	159	.	14
M 3	.	.	47	.	7 $\frac{1}{2}$
N 3	.	.	20 $\frac{1}{2}$.	2 $\frac{1}{2}$
K 4	.	.	328	.	45 $\frac{1}{2}$
L 4	.	.	198 $\frac{1}{2}$.	10 $\frac{1}{2}$
M 4	.	.	61	.	12
N 4	.	.	36	.	5

Post hoc calore solis exsiccavi, exsiccatas verò tertia vice ponderavi, die 20°. Maji insequentis.

K 3	pendebat gr.	276 ¹ ₂	hoc est, aucta fuit pond. gr.	4 ¹ ₂
L 3	.	148	.	3
M 3	.	40	.	1 ¹ ₂
N 3	.	18 ¹ ₂	.	1 ¹ ₄

K 4	pendebat gr.	276	hoc est imminuta fuit pond. gr.	6 ¹ ₂
L 4	.	178 ¹ ₂	.	9 ¹ ₂
M 4	.	41	.	8
N 4	.	30	.	1

Subducendo autem incrementa portionum K 3, L 3, M 3, N 3 post exsiccationem ab incrementis eorundem respectivis ante exsiccationem, & addendo decrementa portionum K 4, L 4, M 4, N 4 incrementis eorundem ante exsiccationem, patebit, quantitates urinae naturalis & medicatae, ab unâquâque portione imbibitas, fuisse ut in Tabulâ sequenti.

K 3	imbiberat urinae naturalis gr.	35 ¹ ₂
L 3	.	11
M 3	.	7
N 3	.	2

K 4	imbiberat urinae medicatae gr.	52
L 4	.	20
M 4	.	20
N 4	.	6

Cum itaque numeri 35¹₂ & 52, 11 & 20, 7 & 20, 2 & 6, sint in majori ratione ad se invicem, quam ipsae portiones K 3 & K 4, L 3 & L 4, M 3 & M 4, N 3 & N 4 ante digestionem; patet, urinam medicatam fortius attractam fuisse ab

ac horum calculorum unoquoque, quam naturalem.

Ab his experimentis deduci possunt Corollaria sequentia:

1. Ipsa aqua mera praedita est vi solvendi calculos humanos, caninos, equinos; fortasse concretiones quasvis, ex fluidis animalibus factas. Consultantur experimentum 1^m. 2^m. 3^m. 5^m. 6^m. & 7ⁿ; Item experimenta Cl. *Littraei* in *Actis Regiis Parisiensibus* anni 1720; nec non experimenta Cl. *Halesii* in Dissertationibus ejus staticis. Si igitur rarus merae aquae pertransiret renes & vesicam quotidiè per temporis spatium sufficiens, omnes omnino calculos ibidem haerentes solveret. Tantum abest, ut necesse sit, menstruum aliquod acidum vel acre in renes aut vesicam deduci ad hunc finem. Verum aqua epota, nisi simul adjungatur medicamentum lithontripticum, fit urina naturalis incrustans, utpote plus quam saturata ipsis calculi elementis. Idem dici potest de reliquis liquoribus in vietu communi usurpati, quorum plerique calculo solvendo pares esse videntur extra corpus.

2. Aegris, haec remedia justâ quantitate assumentibus, urina medicata alcalina virtute lithontripticâ donatur. Patet per experimentum 1^m. 2^m. 3^m. 4^m. 5^m. 10^m. & 11^m. Benè memini, quantum mihi ipsi gratularer, cum vidisssem even- tum primi & secundi experimenti. Haec quippe videbantur non minus rem ipsam tangere, quam historiae aegrorum, calculi fragmenta & laminas reddentium, subsecente Symptomatum cessatione. Frustra objiciebatur, nescio quae, impossibilitas cor-

pus adeo durum solvendi, nisi a fluido acriore quam ut impunè ferrent renes & vesica, nec non perducendi virtutem lithontripticam a ventriculo per recessus & exiles corporis meatus usque ad organa urinaria. Fieri potest, quicquid factum est; Quid autem sit his in rebus impossibile, non est humani ingenii definire.

3. Vires lithontripticae decocti saponacei & ipsius urinae medicatae alcalinae tam parum a se invicem distant, ut nullo modo sit operae pretium, decoctum illud in vesicam injicere, spe calculi promptius solvendi. Patet per experimentum 2^m. & 3^m. Quas ob causas acciderit, ut aquae fluvialis vis solvens decocti saponacei & urinae medicatae in 1°. & 2°. experimento, at in 3°. tam prope ad eandem accederet, prorsus nescio.

4. Experimenta instituta in portionibus similes calculorum eorundem, digerendo aut decoquendo illas similiter, ne variatâ quidem vel minutissimâ circumstantiâ, in urinâ naturali, uti fiebat in experimento 1°. 2°. 3°. 5°. 9°. 10°. 11°., multùm lucis & roboris apportant, si quae forte desint. Retinebat enim urina naturalis in experimento 1°. 3°. & 11°. vim illam incrustantem extra corpus, qua potiri eam intra corpus abunde constat ex Historiâ calculi; & pari ratione necesse est, ut urina medicata alcalina praedita sit illâ virtute lithontripticâ intra corpus, cujus actio extra corpus est tam manifesta. In experimento quidem 2°. abstersio spongiâ madidâ, in 5°. vis ignis, impedimento erant vi incrustanti urinae naturalis; eadem tamen, ac in caeteris experimentis, remanent differentia inter effectum urinae medicatae. Ab

expe

experimento 9°. colligi potest, urinam illam naturalem vim quandam solventem exercuisse in calcum renalem, pari forte ratione, ac urina naturalis calculosorum nonnunquam ita mutari videtur intra corpus, ob regimen diversum aliasve causas, ut deponat vim suam incrustantem, fragilem reddat calculi superficiem, & fragmenta secum dederat. Attamen calculus alter renalis experimenti 10^{mi}. tantâ cum celeritate decrescebat, ut eadem circiter differentia inter vires urinae naturalis & medicatae hic rursus appareat.

De abstersione notandum est, quod etsi expedit periculum facere, quid per se valeat urina medicata sine abstersione, id quod feci in experimento 4°. 5°. 10°. & 11°., attamen motum corporis, & praesertim frequentes illas & vehementes vesicae partiumque adjacentium contractiones, quae calculosis solenniter adsunt, non levem vim habere in acceleranda calculi solutione intra corpus, & abstersionis, lenis saltem, vice fungi.

5. Numerus calculorum ab urina medicata solutorum tantus fuit, quorundam etiam textura adeò compacta, & durities adeò insignis, ut jure inferri possit, vim urinae medicatae solventem pertingere ad calculos humanos ferè universos. Patet quidem per experimentum 10^m., portionem quandam durissimam, coloris ferrum rubiginosum referentis, auctam fuisse ex mensis unius digestione in urina medicata; verum exinde deduci non potest, prorsus indissolubilem fuisse, quoniam portio G 4, quae tandem integrè soluta est, permanferat ante hoc immutata per septimanam in

d

expe-

experimento 2°., dein per mensem in 3°. Et incrementum portioni illi durissimae accedens forsitan debebatur intimae cuidam unioni inter solvens & solvendum, quam solutioni praeire, necesse est. Talem dari unionem inter calculum & urinam medicatam, patet per experimentum 11^m. Quin & in aliis quibuscunque solutionibus remita se habere, perquam verilimile est. Analogia porro solutionum reliquarum postulare videtur, ut menstruum, par solvendis tot calculis, ad omnines tandem comminuendos, utut multum inter se discrepantes, efficax reperiatur. Aurum omne solvitur ab aqua regia, sulphur omne ab alcali fixo, substantia omnis animalis a lixivio sapponis, resinae omnes ab alcohole, gummi omnia ab aquâ. Quod itidem dici potest de concretissimis quibusvis, quorum partes coagmentantur operum gummi, resinae &c.; dissolvantur oportet concreta illa ope aquae, alcoholis &c. respectivè. Jam vero praedicta corpora, tam solvenda quam solventia, licet eodem generali titulo comprehensa, patiuntur diversitates majores vel minores ob causas innumeratas, propter quas etiam solutio promptius vel tardius perficitur. Eadem ratione diversa sunt & calculorum & urinae medicatae genera, a diversis aetatibus, temperamentis & id genus aliis, originem ducentia; modus item solutionis, tempusque illi absolvenda necessarium, magnoperè variantur, tum intra tum extra corpus, uti patet ex Historiis & experimentis supra recensitis, quae idcirco se mutuò stabilint, simulque Analogiae allatae fidem adstruuunt. At tamen non est credendum, si calculus A con-

iter

stet ex aëre sub forma inelaistica , aqua , oleo , sale & terra , calculum B quovis horum prorsus destitui. Ideòque , sive urina medicata alcalina aërem latentem expedit , sive oleum ad se trahat , sive tendat ad salis neutrius partem acidam , illamque a terrestri salis parte dissociet , sive magna vi imbibita calculum disrumpat , sive horum unumquodque quodammodo praestet , (possunt enim forsan omnia cognitione quadam inter se conjungi ,) sive quaevis alia sit ejus actio , verisimillimum est , eandem actionem efficacem fore ad calculos quoeveris solvendos , licet variato modo & tempore , pro varia natura & proportione mutua partium componentium calculi & urinae medicatae. Calculus parvus I 4 , granorum $21\frac{1}{2}$, non erat integrè absemptus ab urina mea medicata , nisi absoluto 11 . septimanarum spatio ; qua re , positis iisdem circumstantiis intra corpus ac in experimento 3° . , calculus ejusdem generis , pendens unciam integrum , desideraret annos aliquot ad sui solutionem perficiendam. Laborant nonnulli per annos decem , viginti , triginta , nec tamen adest illis calculus major , quam qui in aliis subnascitur spatio multò breviori. Ubi autem calculi generantur tardè , credibile est , augmentum fieri per appositionem elementorum minorum , atque adeo haec elementa arctius cohaerere inter se , juxta observatum *Newtoni* , ex Phaenomenis quam plurimis comprobatum , quaecunque tandem sit cohaesio- nis causa.

Quapropter exspectari potest , ut calculi , tardè increcentes , tardè quoque decrescant ; & ut ,

qui laboraverint per annos permultos , necesse habeant , semet taedio remediorum longiori subjicere. Fieri etiam potest , ut in junioribus acidi abundantia , olei vero inopia , partim in causa sint , quòd eorum calculi difficilius cedant remediorum actioni. Verum , ut tandem finem faciam , non vereor asserere , & pro asserto meo vindicando ad experientiam futuram provocare , omnes calculos viarum urinariarum plus minusve semper decrescere , ubi haec remedia justâ quantitate assumuntur , cum idoneo regimine.

Addendum est , experimenta quaedam nuper instituta fuisse a suprà laudato Cl. *Geffroio* in urinam medicatam , a Viro autem celeberrimo *Salvatore Morando* , Chirurgo *Parisensi* , in urinam tum naturalem tum medicatam , cum praecedentibus quod ad scopum primarium congruentia.

Ultimum genus argumentandi desumptum est ex vi lithontripica ipsorum remediorum , sive , quod eodem recidit , ex vi lithontripica *lixivii Japonis* & *aquae calcis*.

Cl. *Halesius* nuper instituit experimenta quaedam , huc spectantia. Quae cum sint maximi momenti , ad vires *Lithontripici* hujus illustrandas & confirmandas , magnam me apud vos gratiam initurum esse , non dubito , proferendo Compendium Dissertationis , ab illo lingua vernacula evulgatae , in qua haec experimenta , unà cum observationibus quibusdam inde deducendis , recensentur.

Sumpsit *Halesius* calculos *A* & *B* , serraque divisit utrumque in portiones bene multas. Calculus

culus *A* ingens erat , & fusco - paillidus. Calculus *B* moriformis , nigro - fuscus , & valde durus , uti vel ex eo patuit , quod partes serra divisaे splendescabant , ad instar marmoris ex-politi.

Portio calculi *A* decocta in *Lixivio saponis capitali* per semihoram fuit integrè soluta. Circum-dabatur autem durante coctione bullis aëreis , serie successivâ usque disruptis & renascentibus , quod inter certissima calculi fatiscientis signa haberri debet , eò quòd calculus prae caeteris plerisque corporibus abundet aëre sub formâ inelastica concluso , uti in Dissertationibus suis Statis-cis ostendit idem Halesius.

Lixivium saponis capitale est Lixivium calcis vivae & salis fixi alcalini adeò forte , ut saponi confiendo sit idoneum. Continet autem in se *Lixivium capitale Nostratum* partem circiter quintam salis caustici , *Lapidis Infernalis* dicti , sicut patet per evaporationem; estque ejus gravitas spe-cifica ad aquae gravitatem specificam in ratione 7. ad 6. , vel paulo majori.

Decocâtâ portione calculi *B* in eodem *lixivio capitali* per horae spatum , partes externae ita emollitae sunt , ut limi rigentis speciem prae se ferrent , internae verò factae putridae & fragi-les.

Portiones aliae tres calculi *A* integrè solutae fuere ab eodem *Lixivio capitali* solâ digestione , magis calida quidem spatio horarum quatuor , minus calidâ horarum octodecim , frigidâ dierun- trium.

Portio item alia calculi *B* devenit putrida & fragilis, digestione calidâ dierum septem in eodem Lixivio.

. Verùm, quod maximè notandum est, portio iterum alia calculi *A* decocta in lixivio salis fixi alcalini solius, ejusdem gravitatis specificae cum illo *Lixivio capitali*, nullam mutationem passa esse videbatur.

Est igitur *Lixivium capitale*, sive *Lixivium calcis vivae* & salis fixi alcalini simul maceratorum, potentissimum ad calculos solvendos menstruum, *Lixivium* salis alcalini solius vincens immenso intervallo, & a spiritu nitri unice vincendum, quantum hucusque innotescit.

Haec autem *Lixivii capitalis* vis adeò insignis deberi videtur erectae cuidam & lacinanti Polaritati, quam igneae particulae calcis vivae imperitiuntur salibus fixis alcalinis; eodem modo, quo calor intensus spiritus acidos summè corrosivos progenerare creditur, vel magnes cogit limaturas ferreas in morem setarum erectarum se compонere. Quin & frigus acre similem polaritatem donat aquae, namque pruina constat ex hujusmodi spiculis lacinantibus, eò longioribus majoribusque, quò frigus est intensius, modo aëris humiditas tanta sit, ut non deficiat aquae copia requisita. Probabile est porrò, pruinam pascua investientem non minùs ipso arsenico lethalem fore animalibus gramine vescentibus, nisi statim liqueficeret calore leni.

Ex eadem fortasse polaritate derivanda est imensa vis expansiva aquae gelascentis (abit autem inter

inter gelandum in Chrystrallos, hujus polaritatis indices,) ut & gravitatis specificae imminutio, potius, quam ab intromissione particularum nitrosarum, quae aquae gravitatem specificam augere debent. Nam, si particulae aqueae novas formas induant ex actione frigoris, fieri potest, ut hae novae formae augmentum molis poscant, simulque, ut tanta sit vis cohaesione mutuae inter illarum elementa, qua vel globus ferreus disrumpatur, quod alias expertus est *Halesius*, ut videre est in Dissertationibus ejus Staticis.

Sed & Polaritas hujusmodi (a quacunque de-
mum causa ipsa oriatur) multum pollere vide-
tur in formatione corporum naturalium, & for-
tasse figurae irregulares quorundam calculorum
vesicae huic ex parte debentur.

Quod autem ad Lixivium praedictum salis fi-
xi alcalini solius, non statim concludendum est
ab experimento in illud instituto, nulla vi sol-
vendi donari. Namque alia portio calculi *A* si-
militer decocta fuit per horae spatium in deco-
cto saponis, sine effectu sensibili, cuius tamen
vis solvens respectu calculi *A* patuit ex eo, quod
portio ejus alia, digesta in hoc decocto per dies
quindecim calore leni, conversa fuit in mucum
album, nucleo parvo fragili excepto. Observan-
dum est etiam, calculum *A* durioribus accensi-
bere, nam portio ejus, digesta per decem septi-
manas in aqua pluviali calore leni, non fuit im-
minuta ad sensum.

Ex variis modis, quibus solutiones calculo-
rum, in *lixivio capitali* & urina medicata dige-
d 4 storum,

storum , peractae sunt , aliquo modo expiscari queamus naturam calculi adhuc haerentis in vesica , nempe conferendo fragmenta , evacuata ab aegro remedia assumente , cum solutionibus extra corpus factis.

Urina medicata solet esse turbida & quasi lactea , simulque deponere , intra aliquot minuta prima , sedimentum album & grave. Colloquente mecum Halesio de natura hujus sedimenti , ut & fragmentorum , à remedia assumentibus evacuatorum , instituimus sequens Experimentum : Sumpsimus tres tubulos fumo tabaci hauriendo destinatos , & indidimus singulis respectivae fragmenta quaedam calculi genuini , fragmenta alia ab aegro remedia assumente evacuata , & sedimentum exsiccatum alterius aegri. Priora duo igni imposita brevi avolarunt ferè integrè , uti solet calculus humanus ; dum interea ex granis duodecim sedimenti exsiccati restabant grana septem , ex quo licet colligere , calcem remediorum in vias urinarias perduci.

Sumpsit *Halesius* uncias quatuor civilis pondensis averdupois dicti , sive grana 1752. , *Lixivii Capitalis* , & evaporavit ad siccitatem. Relicta sunt grana 320. salis caustici alcalini. Huic sali affudit aquae quantitatē evaporatae aequalem , nempe grana 1432. , & dein filtravit. Restabat in filtro calx sicca , insulsa , pendens grana undecim , quae nullum passa est deliquium , licet exposita fuerit aëri per intervallum satis magnum. Repetitis evaporatione , affusione , & filtratione , secunda vice , restabant in filtro grana septem calcis ejusdem insulsaæ , tertią verò , tantum grana duo ;

duo; quae quidem quantitas ultima nihilo major est, quam si lixivium salis alcalini solius filtratum fuisset. Ex purissimis enim lixiviis, etsi jam pridem saepissime filtratis, usque haberi potest nonnihil capitum mortui per novam filtrationem. Patet interea per duas priores filtrationes, calcis grana 18. contineri in granis 320. salis caustici saponis; adeoque calx medicatae urinae aliquâ ex parte derivatur ab hoc fonte, licet pars praecipua proveniat a calce testarum.

Sed, quod imprimis animadversione dignum est, aliud lixivium capitale privatum fuit insigni sua solvendi virtute, ex eodem processu evaporationis, affusionis & filtrationis ter repetito, sapore ejus simul facto minus acri. Retinebat illam quidem post processum primum, ut & post 2^{dum}, verum portio calculi digesta in eo post 3^{um} dies bene multos, exhibuit nil nisi superficiem paulum emollitam.

Interea haec vis solventis abolitio nec adscribenda est calci per filtrum sublatae, namque, evaporatione & affusione ter repetitis sine filtratione, idem comparuit effectus; nec evaporationi particularum aliquot penetrantium, cum invenerit *Halesius*, destillatione lixivii capitalis in hunc finem institutâ, nil nisi meram insulsam aquam adscendere in Recipientis. Restat itaque, ut haec virtutis solventis abolitio aquae affusioni repetitiae debeatur, qua scilicet particulae igneae calcis vivae restinguuntur, textura & unio calcis vivae cum salibus alcalinis immutatur, Polaritasque inde pendens destruitur. Pari ratione fieri potest for-

tasse , ut vis solvens salium alcalinorum saponis multum imminuatur a transitu eorum per viscera & vasa in renes ; & ut testae calcinatae ideo sint utiles praecipue , quod hanc Polaritatem in tantum augeant , ut vis ejus possit pertingere in vias urinarias.

Unciis duabus *Lixivii capitalis* oleo vitrioli saturatis , illicò deciderunt ad fundum vasis grana viginti salis neutri , *salem mirabilem Glauberi* referentis. Liquor autem supernatans privatus fuit solvendi virtute.

Invenit Cl. *Geoffroius* experimento ad hunc scopum destinato , *saponem Alicanticum* contineare salem alcalinum ad sextam circiter sui ipsius partem. Cum itaque *Lixivium capitale nostratum* contineat salem fixum alcalinum ad quintam sui ipsius partem , ut suprà notatum est , partes sex Saponis aequabuntur partibus quinque *Lixivii* , quod ad quantitatem salis alcalini , hoc est , unciae duae Saponis aequabuntur sesquiunciae & scrupulis quatuor Lixivii , Saponis unciae duae cum semiisse unciis duabus & scrupulis duobus Lixivii , & Saponis unciae tres Lixivii unciis duabus cum semiisse.

Sumpsit *Halesius* tres Phialas , ejusdem circiter magnitudinis , sed labiorum crassitie multum inter se discrepantes , invenitque , *Lixivii capitalis* guttas 194. , 150. , 116. delapsas respectivè è Phiala minima , mediae , & maximae labiorum crassitiei , sibi invicem , ut & drachmae unius ponderi , aequari. Quae quidem gutterum diversitas , pro varia crassitie labiorum Phialae , e quâ deſtil-

destillant, res est non levis momenti in arte Pharmaceuticâ, mereturque singularem considerationem.

Hinc patet, si guttae magnitudinis mediae sumantur, Saponis uncias duas aequari guttis 2000. Lixivii, Saponis uncias duas cum semisse guttis 2500. Lixivii, & Saponis uncias tres guttis 3000. Lixivii.

Sumpsit *Halesius* portiones 27. calculi *A*, magnitudine quidem diversas, sed intra limites granorum 3. & 14. constitutas, illasque indidit totidem Phialis, unciarum circiter duarum aquae capacibus, numerisque 1., 2., 3. &c. usque ad 27. respectivè insignitis. Infusa est uncia urinae naturalis singulis Phialis, additis guttis *Lixivii capitalis* ab una, augmento facto, usque ad viginti sex guttas, pro numero Phialae cujusvis, verum Phialae 27. sola urina naturalis inerat. Digestae fuere hae portiones leni calore, & liquores mutati manè quotidie. Exactis diebus 16., portiones omnes, digestae in phialis a numero 17. ad 26. inclusivè, ubi scilicet aderant plus quam 16. guttae *Lixivii Capitalis*, factae sunt albae & molles ad notabilem a superficie distantiam, & intra dies 13. amplius integrè solutae, nisi quod exiguus & putridus nucleus nonnullis adhuc remansit. Post dies 39. ab initio digestionis exemit & exsiccavit portiones 16. primas, ut & portionem in phialâ 27. digestam. Haec portio aucta fuit pondere granorum 2., hoc est quintâ sui ipsius parte, salibusque quasi crystallizatis obtecta. Portiones 1. & 2. nec auctae fuere, nec imminutae. Reliquae omnes imminutae. Hinc patet, guttas tres *Lixivii*

vii capitalis cum unciâ unâ , nimirum guttis circiter 1200. , urinae naturalis commixtas , sive partem unam *Lixivii capitalis* cum partibus 400. urinae naturalis , vim ejus incrustantem tollere posse , contrariumque impertiri.

Dictum est supra , *saponis Alicantici* uncias duas cum semiisse continere sales alcalinos guttarum 2500. *Lixivii capitalis*. Jam si ponatur , secundum Keillium nostrum , medianam quantitatem ingestorum & egestorum quotidiè e corpore humano sub forma solida vel fluida aequari unciis 78. , sales autem saponis aequaliter distribui in has 78. uncias , sive per renes , sive per cutim , sive per aliam quamvis viam evacuentur ; patet , dividendo 2500. per 78. , unciam quamvis egestorum e corpore aegri , *saponis Alicantici* uncias duas cum semiisse quotidie assumentis , imbui guttis 32. *Lixivii capitalis*. Quod si sales alcalini saponis secernantur maxima ex parte per renes , tum Uncia quævis imbuetur guttis *Lixivii capitalis* fere duplo pluribus . Quae quidem quantitas abunde sufficeret ad vim solvendam urinae impertiendam juxta experimentum ultimò recitatum , si modò Polaritas salium saponis (aut quaecunque demum sit causa virtutis eorum solventis) illibata permanere posset post transitum per vasa lactea , sanguinea & secretoria . Hoc autem fieri , saltem conjunctâ ope calcis testarum , constat ex Historiis aegrorum & experimentis cum urina medicata institutis . Quin etiam compensatur virtutis imminutio per majorem guttarum numerum . Etenim in experimento ultimo maximus guttarum numerus fuit 26 ; at , aegro remedia media quantitate assumente , uncia quævis

vis urinae continere videtur guttas ad minimum 50.

Observatum est a me supra , dolores in viis urinariis saepenumero augeri solere ab usu remediorum , atque illud non fieri statim , sed elapsis aliquot diebus , a prima eorum assumptione. Hujus rei ratio sic se habet , secundum *Halesium*. Quantitas sanguinis, aliorumque fluidorum corporis humani , multo major est unciis 78., quantitate scilicet illud quotidie pertransiente. Necesse est autem, ut dies aliquot impendantur toti massae sanguinis & reliquorum humorum aequabiliter imbuendae salibus alcalinis saponis , antequam quantitas salium quotidié ingesti , egeri possit itidem quotidie. Afficitur autem fortasse sphincter vesicae magis, quam caeterae partes urinariae, propter celeritatem fluxus urinae ibidem, ex qua magis denudatur muco suo defendantे.

Voluit experiri *Halesius* , quota pars saponis urinae naturali addita vim ei solventem impertiretur , sed nequivit efficere , ut inter se miscerentur.

Digessit *Halesius* varias portiones calculi *A* in variis aquis calcis , invenitque , has omnes vi solvendi validā potitas fuisse. Erant autem eō potentes , quō calx minus extincta , vel minor aquae quantitas proportionalis ipsi affusa.

Hinc colligere licet, testas calcinatas partem non contemnendam obtinere in vi solvente urinae medicatae impertiendā. Quod si decoctum Saponis, superius praescriptum, fieret cum aqua calcis , vice aquae merae ; verisimile est, auctam iri virtutem remediorum sine augmento quantitatis.

Hacte-

Hactenus *Halesius*, vir optimus, & in Philosophiâ Experimentali praestantissimus.

Fortasse non inutile esset experiri, quid *Lixivium capitale* valeat aut per se, aut conjunctim cum calce semi-extinctâ testarum ovorum, vel alia quavis. Exhiberi potest semiuncia *Lixivii capitalis*, in semilibrá lactis vaccini, quater quotidie, sine noxa, ut videtur.

Quin & sal fixus alcalinus, qualis est sal tartari, absinthii, nitrum fixatum, conjunctus cum calce semi-extinctâ, & propinatus in lacte vaccino, fortasse non minus efficax reperietur ad calculos solvendos, quam *testae ovorum calcinatae* & *sapo Alicanticus*. Namque sal tartari, qui vulgo prostat venalis in nostris Pharmacopoliis, acrior videtur, ideoque in solvendo potentior, sale *Saponis Alicantici*, qui scilicet residuum est post hunc combustum. Exhiberi possunt scrupuli quatuor Salis fixi alcalini cum scrupulis item quatuor calcis in semi-libra lactis vaccini, ter quotidiè, sine noxâ, ut videtur.

Sed non adest de his rebus experimentorum copia sufficiens. Interim orandi estis, ut detis operam experimentis instituendis in urinam naturalem & medicatam, in calculos, calcis, sales alcalinos, lixivia, spones & id genus alia, effectusque indè oriundos publici juris faciatis. Campus patet infinitus.

Ipse jam tradidi, breviter quidem, sed summiā cum curâ & fidelitate, quae novi, omnia, ad *Invenitum* hoc illustrandum, confirmandum, & ulterius provehendum, conducentia. Liceat solum pauca adj-

adjudicere de modis, quibus primò *Inventrici* obtigerit, & tandem publici juris factum sit.

Orta est *Joanna Stephens* e stirpe generosa, in comitatu Berks. Affirmare autem possum ex triennii, & quod excurrit, experientiâ, praeditam eam esse indole perquam bonâ, sagacitate verò non mediocri. Viginti circiter abhinc annis fortè obvenit illi praescriptum pro calculo solvendo, constans testis ovorum furno coctis & pulveratis. Has porrò sic exhibuit; sed aliquo post tempore exussit igne culinari, primò ad nigritiem, deinde donec rursus alberent, & sibi ipsi visa est observare, eo magis efficaces reddi, quò plus igni fuere expositae. Solebat utique tunc temporis propinare scrupulum vel paulò plus *testarum ovorum calcinatarum*, ter quotidie, in vino albo. Cum verò alvi adstrictio pertinax abhinc persaepè oriretur, adjuñxit pro re natâ parvam quantitatem *Saponis*, quem etiam ad calculum promptius solvendum conferre posse suspicata est. Huic porrò Methodo instituit per annos aliquot, eam fabulo renum amoliendo, vel etiam calculis vesicae interdum solvendis, parem esse experta. Duodecim circiter abhinc annis exhibuit testas calcinatas dosi majori cuidam, nomine *Coxon*, seni fere octogenario, addita etiam saepenumero Saponis semiunciâ, sub forma *Hæstūs*. Is calculi vesicae Symptomatis laboraverat per aliquod tempus; reddidit autem laminas & fragmenta calculi permulta, evasitque soluti calculi exemplum insignius, quovis alio priori. Hoc igitur animata exhibuit tum pulverem tum Saponem majori adhuc quantitate, eventu pariter feliciore.

Anno 1735. Vir Honorabilis, Eduardus Carte-
ret, Veredariorum publicorum Praefectus genera-
lis, incepit uti *Lithontriptico* & plurimum levami-
nis exinde persensit. Increbuit illicò fama illius,
numerisque aegrorum assumentium auctus est quo-
tidiè. Anno 1737. adfuère tot sanationum exem-
pla, tantis quoque testibus confirmata, ut Arcani
desideratissimi cita patefactio humani generis sum-
moperè interesse videretur. Rogata est itaque *In-
ventrix*, ut id publici juris faceret, oblatâ conditio-
ne *quinquies mille librarum monetae Anglicanae*, ex
privatorum munificentia voluntaria colligendarum.
Sed defuit huic proposito successus optatus. Qua-
re, ineunte anno 1739., consilium ei datum est,
ut a *Senatu Britannico* praemium illud peteret, hac
quidem lege, ut Arcanum patefactum examini subji-
ceretur priùs, quam concederetur praemium. An-
nuit *Senatus*, *Decretumque* illius *Regio Assensu* confir-
matum fuit 14°. 1739. Notitia remediorum statim
publici juris facta est. Experimenta super iis insti-
tuta. Eventus promissis respondit; accepitque *In-
ventrix* Praemium supra memoratum Martii 5°.
1740.

Dabam Londini;

Jan. 16. 1741.



Fig. 1



Fig. 3



Fig. 5



Fig. 2



Fig. 4



Fig. 6




Fig. 7



Fig. 11




Fig. 12



Fig. 13



Fig. 14



Fig. 8



Fig. 9




Fig. 10



Fig. 15



Fig. 16

Weis Argent. sc.





